


宋元明清傳記
資料叢刊系列

宋代傳記 資料叢刊

本社影印室 輯

北京圖書館出版社



宋代傳記 資料叢刊

本社影印室輯

4

北京圖書館出版社

明·柯維騏 撰

宋史新編·列傳

卷五十七—七五

明嘉靖刻本

宋史新編卷一百十五

列傳五十七

明南京戶部主事莆田柯維騏編

王存

孫固

趙瞻

傅堯俞

王存字正仲丹陽人年十二辭親從師于江西五年始歸登進士第由簿令歷館閣校勘集賢校理史館檢討知太常禮院存故與王安石厚安石執政論事多不合在三館歷年不少貶以干進累上書陳時政因及大臣無所附麗皆時人難言者元豐初神宗察其忠實無黨累擢右正言知制誥同脩國史兼判太常寺論熙寧以來群臣緣論事得罪或詿誤被斥者宜隨材召擢語合

上意收拔者甚衆又言赦令出上恩而議法治獄者乞
不以赦降原減官司禁謁本防請託而弔死問疾一切
杜絕皆非便執政不悅五年遷至兵部尚書轉戶部元
祐初連遷尚書左右丞蔡確以詩怨訕存與范純仁欲
薄其罪確再貶新州存亦爲確罷知蔡州蓋存初轉兵
部確力也人善其能損怨云又知揚州進至資政殿學
士召爲吏部尚書時朋黨之論寢熾存爲哲宗言慶曆
中或指韓琦富弼范仲淹歐陽脩爲黨賴仁宗聖明不
爲所惑今日果有進此說者願陛下察之由是復與任
事者戾除知大名府改知杭州紹聖初請老提舉崇禧

觀遷右正議大夫致仕舊制當得東宮保傅議者指存
嘗議還西夏侵地故殺其恩典既而降通議大夫卒年
七十九贈左銀青光祿大夫存性寬厚平居恂恂不爲
詭激之行至其所守確不可奪司馬光嘗曰竝馳萬馬
中能駐足者其王存乎

孫固字和父管城人登進士第始仕州縣爲宰相韓琦
所知歷官穎王宮侍講穎王爲皇太子又爲侍讀卽位
擢天章閣待制知通進銀臺司种諤取綏州固上言兵
凶器也動不可妄妄動將有悔大臣惡其說出知澶州
還復領銀臺封駁兼侍讀判少府監神宗問王安石可

相否對曰安石文行甚高處侍從獻納之職可矣宰相自有其度安石稍狹少容必欲求賢相呂公著司馬光韓維其人也凡四問皆以此對及安石當國更法度固數議事不合又極陳青苗匪便時議尊僖祖爲始祖固議曰漢高以得天下與商周異故太上皇不得爲始祖光武中興不敢祖舂陵而祖高帝宋有天下傳之萬世太祖功也請以爲始祖而別爲僖祖立廟禘祫之日奉祧主東向以伸其尊韓琦是其議而安石主僖祖語在禮志出知真定府又知開封府進至樞密直學士元豐初同知樞密院事謀者告夏人幽其主帝欲西討固數

言舉兵易解禍難必不得已請聲其罪薄伐之分裂其地使其酋長自守焉帝笑曰此真酈生之說爾其後師果無功帝曰朕始以孫固言爲迂今悔無及矣改太中大夫樞密副使進知院事以疾避位拜觀文殿學士知河陽尋奉祠哲宗立歷拜門下侍郎復知樞密院事累官右光祿大夫卒年七十五贈開府儀同三司諡溫靖固宅心誠粹不喜矯亢與人居久而益信故更歷夷險不爲人所疾嘗曰人當以聖賢爲師一節之士不足學也又曰以愛親之心愛其君則無不盡矣傅堯俞銘其墓曰司馬公之清節孫公之淳德蓋所謂不言而信

者也世以爲確論紹聖時奪遺澤元符列黨籍徽宗以固嘗爲神宗宮僚特出籍悉還所奪

趙瞻字大觀永城人父剛太子賓客徙鳳翔之藍屋瞻登進士第初歷州縣有惠政治平初自都官員外郎除侍御史上疏曰英斷獨化人主至權也審至權者當主以天下之大公揆以天下之正論如是而後權可一也英宗稱善時議追崇濮王瞻引漢師丹董宏事力爭會使契丹及還聞呂誨等以諫濮議罷乞與同貶不報趣入對英宗曰卿欲就龍逢比干之名孰若効伊尹傅說哉瞻言臣不敢奉詔使朝廷有同罪異罰之譏遂通判

汾州神宗卽位累遷開封府判官神宗問卿知青苗法
便乎對曰青苗法唐行於季世擾攘中培民財誠便今
欲爲長久計愛養百姓誠不便初王安石欲瞻助已使
其黨餌以知雜御史瞻不應由是出爲陝西轉運副使
改永興軍轉運使以親老請知同州歷知滄州哲宗立
擢至樞密直學士同知院事初元豐中河決小吳北注
界河東入于海神宗詔東流故道淤高理不可回其勿
復塞乃開大吳以護北都至是都水王令圖請還河故
道瞻固爭之卒罷役如瞻議瞻又奏廢渠陽軍紆荆湖
之力乞詔諭西夏使歸永樂遺民夏人聽命卒年七十

二太皇太后語輔臣曰惜哉忠厚君子也車駕親臨贈銀青光祿大夫謚懿簡紹聖中追奪所贈官列于黨籍瞻著春秋論二十卷史記牴牾論五卷唐春秋五十卷奏議十卷文集二十卷西山別錄一卷

傅堯俞字欽之濟源人十歲能爲文未冠登第石介每過之未嘗不在介曰少年不以游戲爲娛何也堯俞曰性不喜鄙雜介奇之歷知新息縣累遷太常博士嘉祐末爲監察御史仁宗春秋高堯俞請建儲以慰天下望及英宗爲皇子有司闕供餽堯俞言非所以隆親親重國本也於是詔供具甚厚英宗卽位轉殿中侍御史遷

起居舍人內侍任守忠讒問兩宮堯俞諫皇太后曰天下之可信者無大於以天下與人亦無大於受天下以公况皇帝以明睿之資貫通古今而受人之天下乎如誅竄讒人則慈孝之聲竝隆矣於是皇太后還政逐守忠堯俞言於帝曰皇太后給事左右之人宜頗錄勤勞少加恩惠上慰母后下安反側遷右司諫同知諫院帝眷遇堯俞嘗問曰多士盈庭孰忠孰邪堯俞曰大忠大佞固不可移中人之性繫上所化帝納其言大臣議濮王稱皇考堯俞與侍御史呂誨抗論凡十餘䟽遂易考稱親堯俞又言親非父母而何夫恩義存亡一也先帝

既以陛下爲子當是時設濮王尚無恙陛下得以父名之乎又因水災言簡宗廟則水不潤下今以濮王爲皇考於仁宗之廟簡孰甚焉俄命堯俞與趙瞻使契丹比還呂誨等皆以諫濮議罷堯俞請同貶遂出知和州神宗卽位徙知廬州熙寧三年至京師王安石素與之善方行新法謂之曰舉朝紛紛俟君來久矣將以待制諫院處君堯俞曰新法世以爲不便誠如是當極論之平生未嘗好欺敢以爲告安石愠之但授直昭文館權鹽鐵副使俄出爲河北轉運使改知江寧府徙許州河陽徐州再歲六移官困於道路知不爲時所容請祠先是

徐人告有談天文休咎者堯俞坐不卽捕削官職稍起
監黎陽縣倉草場郡掾行縣堯俞從衆出迎盡禮守爲
遣他吏代主出納堯俞不可曰居其官安得曠其職凡
十年哲宗立召知明州召入連擢御史中丞奏言人才
有能有不能如使臣補闕拾遺以輔盛德明善攻失以
平庶政舉直措枉以正大臣臣雖不才敢不盡力若使
窺人陰私扶人細故則非臣所能亦非臣之志也御史
張舜民以言事罷堯俞請留不聽遂以龍圖閣待制知
陳州未幾復舊職前宰相蔡確坐詩誹謗貶新州宰執
侍從以下罷者七八人御史府爲之一空堯俞曰確之

黨其尤者固宜逐餘可一切置之且言以陛下盛德乃於此不能平願聽之如蚊蟲過耳無使有纖微之忤以奸太和之氣事至以無心應之聖人所以養至誠而御遐福也進吏部尚書兼侍讀元祐四年拜中書侍郎六年卒年六十八哲宗與太皇太后哭臨之太皇太后語輔臣曰傅侍郎清直一節終始不變金玉君子也方倚以相遽至是乎贈銀青光祿大夫諡獻簡坐元祐黨奪贈諡後黨錮解下詔褒贈錄其子堯愈厚重言寡不設城府人自不忍欺論事君前略無回隱退與人言不復有矜異色司馬光嘗謂邵雍曰清直勇之德人所難兼

吾於欽之見焉雍曰欽之清而不耀直而不激勇而能溫是爲難爾從孫察見忠義傳

論曰方王安石得君當國平生交遊誰無希望王存孫固趙瞻傅堯俞寧輟舊好終不肯依阿受其誘餌及與政多獻替然一切持平無或矯激至謂蔡確不宜深罪與范純仁彭汝礪所見皆同何主議者弗之諒也羅仲素有言士之立朝要以正直忠厚爲本存等得之矣

梁燾

王巖叟

鄭雍

孫永

梁燾字况之須城人以父禱任爲太廟齋郎舉進士中第歷集賢校理通判明州檢詳樞密五房文字元豐時

久早上書論時政曰青苗之錢未及償而責以免役免役之錢未暇入而重以淤田淤田方下而復有方田方田未息而迫以保甲其爲害之實雖有言者而上下相蒙竟成就其事臣謂天下之患不患禍亂之不可去患朋黨蔽蒙之俗成使上不得聞所當聞故政日以敝而禍亂卒至也內侍王中正將兵千賞不以法燾爭之不得請外知宣州未幾提點京西刑獄哲宗立召遷太常少卿右諫議大夫文彥博議遣劉奉世使夏國御史張舜民論其不當遣被黜燾力爭之時同論者傅堯愈王巖叟朱光庭王覲孫升韓川七人悉召至都堂敕諭以